



20  
Aldijama

Na osnovu člana 16. Zakona o Vladi Unsko-sanskog kantona („Službeni glasnik Unsko-sanskog kantona“, broj 5/08) i člana 8. Zakona o službenom glasilu Unsko-sanskog kantona („Službeni glasnik Unsko-sanskog kantona“, broj 19/23), na prijedlog sekretara Vlade, Vlada Unsko-sanskog kantona na svojoj 50. sjednici, održanoj dana 13.6.2024. godine,  
d o n o s i

## ODLUKU

o načinu i formi dostavljanja i objavljivanja akata u Službenom glasniku Unsko-sanskog kantona te čuvanju i pristupu elektronskim datotekama  
Službenog glasnika Unsko-sanskog kantona

### Član 1.

(Predmet)

Ovom Odlukom propisuje se način i forma dostavljanja i objavljivanja akata u Službenom glasniku Unsko-sanskog kantona te čuvanje i pristup elektronskim datotekama Službenog glasnika Unsko-sanskog kantona (u daljnjem tekstu: Službeni glasnik).

### Član 2.

(Gramatička terminologija)

Izrazi koji su radi preglednosti dati isključivo u jednom gramatičkom rodu u ovoj Odluci bez diskriminacije se odnose i na muškarce i na žene.

### Član 3.

(Pojmovi)

Pojmovi korišteni u ovoj Odluci imaju sljedeća značenja:

- a) Akt: ustav, amandman, zakon i drugi propis, opšti i drugi akti,
- b) Organ: Skupština Unsko-sanskog kantona, Vlada Unsko-sanskog kantona, kantonalni organi uprave i upravne organizacije, stručne službe i druga tijela, sudovi, ombudsmen, preduzeća, ustanove i druga pravna lica Unsko-sanskog kantona (u daljnjem tekstu: organ).

### Član 4.

(Objavljivanje akata u Službenom glasniku)

U Službenom glasniku, Ured Vlade Unsko-sanskog kantona (u daljnjem tekstu: Ured) objavljuje akte:

- a) po službenoj dužnosti i
- b) po zahtjevu organa.

#### Član 5.

(Objavljivanje akata u Službenom glasniku po službenoj dužnosti)

- (1) Ured objavljuje po službenoj dužnosti akte koje donosi Vlada Unsko-sanskog kantona i to: uredbe sa zakonskom snagom, uredbe, odluke, Poslovnik o radu Vlade Kantona.
- (2) Rješenja i zaključci, koje donosi Vlada Unsko-sanskog kantona, objavljuju se samo ukoliko je to u njima određeno.

#### Član 6.

(Objavljivanje akata u Službenom glasniku po zahtjevu organa)

- (1) Akti za objavu u Službenom glasniku dostavljaju se istovremeno putem pošte i elektronskim putem.
- (2) Akti za objavu putem pošte dostavljaju se uz potpisan i ovjeren zahtjev ovlaštene osobe organa koji je donio akt uz koji se prilaže ovjeren i potpisan akt za objavu.
- (3) Elektronska verzija akta za objavu dostavlja se u formi Microsoft Word, Times New Roman, font 12., s naznakom „ZA OBJAVU“ na službeni e-mail Ureda: [sluzbeniglasnikusk@vladausk.ba](mailto:sluzbeniglasnikusk@vladausk.ba).

#### Član 7.

(Rok za dostavljanje na objavu)

Akti za objavu u Službenom glasniku dostavljaju se u roku od osam dana, od dana donošenja.

#### Član 8.

(Redoslijed objave)

- (1) Akti dostavljeni na objavu u Službenom glasniku objavljuju se onim redoslijedom kako su zaprimljeni.
- (2) Ured je ovlašten u slučaju zaprimanja većeg broja akata na objavu odrediti prioritete objave, vodeći se odredbama koje se odnose na stupanje na snagu ili odredbama koje su vezane rokom.

#### Član 9.

(Pristup Službenom glasniku)

- (1) Pristup internet izdanju Službenog glasnika omogućuje se preko web portala Vlade Unsko-sanskog kantona u sekciji „Službeni glasnici“.
- (2) Za pristup iz člana 1. ovog Uputstva svaki korisnik mora imati korisničko ime i lozinku.
- (3) Korisničko ime i lozinku dodjeljuje Ured Vlade Unsko-sanskog kantona.
- (4) Broj preuzimanja elektronskih datoteka Službenog glasnika sa web portala je ograničen na 200 preuzimanja mjesečno.

Član 10.

(Čuvanje i zaštita elektronskih datoteka Službenog glasnika)

- (1) Elektronske datoteke Službenog glasnika čuvaju se na serveru Vlade Unsko-sanskog kantona.
- (2) Za održavanje i zaštitu servera odgovoran je Ured za zajedničke poslove Vlade Unsko-sanskog kantona.
- (3) Izvorne datoteke Službenog glasnika, osim na serveru čuvaju se i u Uredu Vlade Unsko-sanskog kantona na eksternom disku.

Član 11.

(Stupanje na snagu)

Ova Odluka stupa na snagu danom donošenja i objavit će se u „Službenom glasniku Unsko-sanskog kantona“.

Broj: 03-02-51-781/2024  
Bihać, 13.6.2024. godine



